

**總題：學為人師 行為世範**

**別題：善財童子參學報告（5）本會一**

### 壹、大眾念請分

- 1.時諸菩薩，及大聲聞，世間諸王，并其眷屬，咸作是念。  
如來境界，如來智行，如來三昧，如來所住，如來最勝…。  
一切世間諸天及人，無能通達，無能遍知…。  
唯除諸佛加被之力…。及自宿世善根之力，親近善友力，深淨信解力，廣大志樂力，趣向菩提清淨心力，求一切智廣大行願力。  
具此內因外緣，深信大欲，勝願廣行，不揀凡聖，必得佛加，則能通達悟入。
- 2.唯願世尊以方便力，隨順我等及諸眾生。種種心量、種種信解、種種智慧、種種言辭、種種名字、種種證得、種種地位、種種根清淨、種種意方便、種種心境界、種種依止如來功德。隨能聽受諸所說法。…惟垂大悲，普為開演。

### 貳、如來三昧分

- 1.爾時世尊，知諸菩薩，一切大眾，心之所念。
- 2.大悲為身，大悲為門，大悲為首，以大悲法而為方便。充滿虛空，遍周法界。
- 3.入於師子頻申三昧。法性寂然強名為定，寂而常照即名為慧。定慧均者名為平等。心智契合名一境性。非合非散，超情絕想，故云三昧。即用之體寂而造極，則差別萬殊，無非法界。即體之用不為而周，故大小相參，緣起無盡。是曰頻申自在之義也。

### 參、淨土現相分

- 1.入三昧已，一切世間普皆嚴淨。
- 2.由入定故，方能現相。精義入神，以致用故。寂然不動，無不通故。三昧即是法之體故。依體起用，用不離體。
- 3.器界嚴有三：一樓閣，二園林，三空中。表三緣起，樓閣表自體緣起。林表有為緣起。空表無為緣起。為與無為既無障礙，即是自體。寄顯差別，三不相離。
- 4.定契心體，不見內外。即事會真，破情顯法。自內而觀，同真性故，廣博無際。自外而觀，不壞相故。閣外有林，林外有空。三重寬狹，莊嚴各異。斯即事理交徹，十方三際，無不圓融。
- 5.何以故？釋意云，如來之德不可思議。文有十句，一宿善根力。二無漏智力。三眾福威力及加持力。餘之七句，神通自在力。略舉十句以顯無盡，云何不能頓淨法界。

### 肆、遠集新眾分

1. 集意有三：
  - (1)集彼同證，令此眾會皆仰慕故。
  - (2)顯三昧力，令諸菩薩來歸附故。
  - (3)令彼作用，以代如來現相答故。
- 2.經文之中，佛名剎號及所表法，可以虛求。然皆人法依正因果事理，事事無礙法界自在德耳。
- 3.文中皆言本事者，表三世法體常住故。由得體用非一異智，以用隨體無不存故。德相業用皆自在故。若理事別修，則不得爾。
- 4.隨機調伏。未熟而化，熟而不化，皆曰失時。今感而遂通，故無失矣。

5. 眾生緣成，故云如幻，如幻不實故空，如幻不無故有。此二不二，即是中道。
6. 了幻無幻，方為見幻。幻法不無，方名為幻。故幻住自性不可思議。
7. 三界六趣，因業受生，猶如夢境，因思所起。隨因善惡，勝劣報生。
8. 世間生起，皆想所持。世間無生，妄起生想。今明了達，依他非實，妄起想心。
9. 國土依報，亦心想生。心變影像，故依想住。心淨土淨，心染土染。
10. 具四無畏，能決定說。具四辯才，說稱物心。不壞相故求智地，不斷煩惱故入世間，證法界故流教海。

## 伍、舉失顯德分

1. 諸佛化儀，事非一準。如賢護等曾謗不輕，於千劫中墮阿鼻獄。其罪畢已，還遇不輕，受其教化。
2. 聞法除疑，自知作佛。令聞慶悟，修見聞種，皆是如來方便大用。或海印炳現。或大權應為。以顯法深，各有由矣。
3. 理契則鄰，菩薩遠而不隔。心迷便阻，聲聞對如聾盲。
4. 身遍剎塵，智入諸法。何不見聞，宿因現緣，並皆缺故。
5. 心意即迷，六根皆昧。耳不聞，心不信，智不知，眼不見，聞慧不能憶念，修慧不能觀察，思慧不能思惟，證智不能證入。由無智慧，安住自乘不進修故。

淨空法師專集網站(簡)製作